

雅瑤清溪黎氏家譜卷一、卷二

雅澂清溪黎氏家譜

(第1冊)

卷一、二

羅一峯先生序

倚歟黎氏。以祿仕開基。上寵三恩。光垂百代。爲南昌望族。旣而清臣寵異。馳驅皇路。宣職南雄郡守。因官卜籍。居於雄之宗敬巷。愉怡其美。宏擴井阡。黎氏所由始也。繼而支派多出。各籍分居。古岡遂有清溪之黎。支延蔓引。實歲其蕤。陳門鄭里。庶幾可追。易曰。積善餘慶。亶其然乎。以黎氏濟濟吉士。明揚繼起。此非詒謀燕翼。有所自來。而仁人孝子。所仰追。歟美者歟。乃先取所傳之譜。祖功宗德之隆。存而脩飾之。支派罔紊。昭穆

瓜瓞其綿。麟趾迭慶。莫不於茲永賴矣。

旨

大明成化十三年歲次丁酉夏五月賜進士及第翰林
院脩撰永豐羅倫頓首拜撰

許教授序

粵稽自古昔名家巨族。莫不有譜。猶國之有乘也。以誌世系之自始。識子孫之蕃衍。凡尊卑之序。親疎之等。及推祖宗功德之隆。累世勤苦之勳。俱於譜是賴。仁人孝子。所以聯疎爲戚。而廣仁孝於無窮。垂休芳於萬禩者。舍譜曷由哉。余邑清溪里。有黎姓者。邑稱望族云。遡厥自始。則自高陽氏之子卷章。卷章生黎。其後以字爲姓。錯居江南等處。名人傑士。彬彬輩。尙矣。至宋之朝。有太祖翁黎仁。仁生黎直。直生黎安。安生黎相。黎同。同生

子周。以鄉科進士起家。出知南雄府。政教彰著。任滿後。就居南雄之宗敬巷。生四子。曰春禾。曰夏禾。曰秋禾。曰冬穀。泰定元年。因避亂遷居。春禾携子黎光。與三孫卜居於古岡。不幸黎光早逝。三孫暨彬佑。尙賴祖撫育成。人後各分籍而居。數百年來。藹藹雲初。其間碩德耆望。濟濟青衿。指不勝屈。惟族譜未脩。誠爲闕畧。今有十七世孫會太。念世系之彌遠。憫宗法之散佚。慨然有木本水源之志。旦夕皇皇。殫厥心力。自太祖以前。畧其所未知者。自春禾以後。詳其所可知者。凡宗支昭穆。存歿脩

短。遠。邇。婚。一。氏。族。罔。不。詳。錄。及。有。行。誼。燕。翼。可。爲。後。世。
法。者。亦。登。載。不。遺。則。會。太。用。心。誠。週。矣。孝。思。誠。遠。矣。夫。
水。之。流。也。萬。派。殊。奔。而。必。歸。於。河。河。乃。水。之。源。也。山。之。
峙。也。萬。嶽。異。形。而。必。本。於。華。非。乃。山。之。宗。也。溯。其。源。探。
其。宗。君。子。於。是。有。敬。祖。睦。族。之。義。焉。黎。氏。之。子。若。孫。得。
是。譜。而。存。之。則。尊。卑。親。戚。一。目。瞭。然。自。然。興。孝。悌。篤。本。
支。而。敦。厚。倫。常。紹。述。先。德。大。亢。厥。宗。有。光。於。前。人。俾。太。
守。之。遺。澤。寢。昌。寢。熾。豈。非。京。兆。氏。一。大。美。哉。則。家。譜。之。
脩。嘉。惠。後。裔。其。功。不。可。泯。矣。不。佞。於。黎。氏。有。世。嫡。之。誼。

茲因會太之請而爲之序。

大明崇禎十六年歲次癸未孟秋吉日原任潮州府儒學署教諭事後補府教授序選知縣事許應運頓首拜撰

二世太祖自序

吾宗始於顓頊之世。顓頊娶鄒屠氏之女生駱明蒼舒等。又娶勝瀆氏之女生卷章。卷章娶女嬌。生黎及回。顓頊命北正黎司地。以屬民。其後以字爲氏。已經多世。散派各方。不盡詳錄。惟豫章南昌府城東清溪里有太祖翁。諱仁者。官至刑科給事。爲吾始祖也。生高祖。諱直。生曾祖。諱安安。生伯祖。諱相。支派南昌舊居。次爲祖考。諱同。同生考。諱子周。宣職南雄府知府。任滿居於雄之宗敬巷。後因避諱改珠璣巷。考生余兄弟四人。長卽余流。字春

禾次潔。字夏禾。三源。字秋禾。同清。冬穀。泰定元年。四月。余與諸弟起遷。同賣田地三十七頃。均分。下古岡州。居住。到清遠灘頭。被狂風雨。船隻淹沒。財物一空。余獨一男名光。不幸溺於水。尙存三孫。亶彬佑。俱幼。吾行年八十有五。恐後不知宗派所自。出。今特書此。與三孫收執。以貽來世。無忘厥本也。

皇元泰定元年甲子歲仲冬吉旦春禾親筆書

旭升祖嘉慶元年重修家譜小序

乾坤奠而父子生。卽似續行焉。此宇宙閒大事也。故五世不脩譜。前賢目爲不孝。誠以上追祖宗。下聯宗族。廣孝思於無窮。播和睦於百世。莫不於譜乎。是賴我祖宗以祿仕開基。由皇元泰定始遷古岡。五百餘年以來。累世勤苦之勲。宗支盛衰之迹。惟藉一譜以誌之。厯觀先世脩茲譜者。苟得其詳。則世系瞭然。稍或殘闕。則父子相失。其所關豈淺鮮哉。先嚴蘊玉翁天性仁孝。存心宗族。屢以前世脩譜未得其人。故缺畧多端。命

加考訂。彌縫其闕。奈以連年舌耕。有志未逮。歲在乙卯。先嚴棄世。余守制居鄉。讀禮之餘。因念欲成先志。莫大於脩譜。迺取所傳家譜。詳加考訂。并令各房自列本支。以彙其全。歷歲餘而稿始定。其間有爵可尊。有行可嘉。必登載不遺。以爲後世所取法。至先世闕畧。無所考證者。卒亦無可如何。仍其舊而已。雖克成先志。不敢妄擬。然於祖宗淵源之所自出。里居之所由遷。以及支派分流。子姓蕃衍。亦彰彰可考矣。閱茲譜者。興孝思。睦宗族。無忘似續之志。是又余之所厚望也夫。

嘉慶元年歲在丙辰冬月至日二十世裔孫曰明旭升
氏頓首拜撰

男如棧
羽儀
建璵
全校

脩譜條欵列左

一圖必牽絲聯氣脉也。

一父子相繼則直書父上子下位尊卑也。

一兄弟比肩橫書兄先弟後序長幼也。

一五世親盡則再提頭綿瓜瓞也。

一遷徙失傳註明遠出俟後填也。

一新歸宗者非詳審確實不敢輕書衛宗祊也。

一無嗣者則書絕字防冒續也。

一出繼本宗者止於所生下書明出繼某若其子則書

於所繼之下正房分也。

一出繼外鄉者止書出繼某其子孫則不書嚴宗派也。

一有賢德才能功勳爵祿者詳加採錄寓勸勉也。

一譜必書諱某字某某號妣某氏係某鄉人葬某處及生

終年月日時一切註明方爲合款茲譜前十餘世或僅

書一名或僅書一字卽妣某氏亦多闕畧大爲失體余

歷詢各房追求各家私譜凡可考者必詳書明以補其

闕後之脩譜者慎勿擅行減省以取罪戾至生終年月

因尺幅甚隘不能盡書余於本房另脩小譜以記六一

此譜修成四本每本分上下兩卷特置森木梗板箱貳
個交元吉房收貯譜貳本元安房收貯譜貳本以垂
久遠

二十世裔孫曰明作培謹識

我情溪黎氏族譜。自嘉慶元年丙辰。旭芳祖重修。多
歷年所。同治乙丑。卽議再脩。惟以舌耕爲業。未能專
注。光緒丁亥。一連五年。又蒙古都公推辦理局務。以故
有志未逮。迄壬辰年。已六十六矣。自忖桑榆晚歲。爲日
無多。倘不卽脩。後代更難考據。爰集眾議。依旭升祖
所脩家譜模樣。詳列祖功宗德。以垂法式於後人。脩成
卽付梓人。多印十數本。任各人領歸藏家。俾覽觀之下。
感動天良。咸知忠孝友悌。禮義廉恥之重。且知某人
有功德。子孫蕃昌。是卽天道之所由昭。人心之所由善也。